

博
物
志

全

Z121.6
1
(12)

博
物
志

中江王潛

潮陽鄭
氏用黃
氏士禮
居本刊

欽定四庫全書提要

博物志十卷舊本題晉張華撰考王嘉拾遺記稱華好觀秘異圖緯之部捃采天下遺逸自書契之始考驗神怪及世間閭里所述造博物志四百卷奏於武帝帝詔詰問卿才綜萬代博識無倫然記事采言亦多浮妄可更芟截浮疑分爲十卷云云是其書作於武帝時今第四卷物性類中稱武帝泰始中武庫火則武帝已後語矣書影有謂藝文類聚引博物志子貢說社樹一條今本不載者案此條實在第八卷中書影蓋偶然未檢然考裴松之三國志註魏志太祖紀文帝紀濊傳吳志孫賁傳引博物志四條今本惟

有太祖紀所引一條而佚其前半餘三條皆無之又
江淹古銅劍贊引張華博物志曰鑄銅之工不可復
得惟蜀地羌中時有解者今本無此語足證非宋齊
梁時所見之本又唐會要載顯慶三年太常丞呂才
奏案張華博物曰白雪是泰帝使素女鼓五弦曲名
以其調高人遂和寡又張彥遠歷代名畫記引張華
博物志曰劉褒漢桓帝時人曾畫雲漢圖人見之覺
熱又畫北風圖人見之覺涼今本皆無此語李善註
文選引張華博物志十二條見今本者九條其西京
賦註引王孫公子皆古人相推敬之詞一條閒居賦
註引張騫使大夏得石榴李廣利爲資師將軍伐大

宛得蒲陶一條七命註引橙似橘而非若柚而有芬
香一條則今本皆無此語段公路北戶錄引博物志
五條見今本者三條其鴝鶒一名雞鴝一條金魚腦
中有麩金出功婆塞江一條則今本皆無此語足證
亦非唐人所見之本太平廣記引博物志鄭宏沈釀
川一條趙彥魏雲麓漫鈔引博物志黃藍張騫得自
西域一條今本皆無之晁公武讀書志稱卷首有理
畧後有鑽文今本卷首第一條爲地理稱地理畧自
魏氏曰以前云云無所謂理畧讚文惟地理有之亦
不在卷後又趙與時賓退錄稱張華博物志卷末載
湘夫人事亦誤爲堯女今本此條乃在八卷之首不

在卷末皆相矛盾則併非宋人所見之本或原書散佚好事者掇取諸書所引博物志而襍採他小說以足之故證以藝文類聚太平御覽所引亦往往相符其餘爲他書所未引者則大抵剽掇大戴禮春秋繁露孔子家語本草經山海經拾遺記搜神記異苑西京雜記漢武內傳列子諸書餽成帙不盡華之原文也又劉昭續漢志註律厯志引博物記一條輿服志引博物志一條五行志引博記二條郡國志引博物記二十九條齊東野語引其中日南野語一條爲博物記當是秦漢間古書張華取其名而爲志楊慎丹鉛錄亦稱據後漢書註博物記乃唐蒙所作今觀裴

松之三國志註引博物記四條又於魏志涼茂傳中
引博物記一條灼然二書更無疑義此本惟載江河
水赤一條又載漢末關中女子及范明友奴發冢重
生一條而分爲兩條又載日南野女一條譌羣行不
見夫句爲羣行見丈夫譌其狀晶且白句爲狀晶目
其餘三十一條則悉遺漏豈非偶於他書見此三條
以博物二字相同不辨爲兩書而貿貿採入乎至於
襍說下所載預章衣冠人有數婦一條乃隋書地理
志之文唐人所撰華何自見之尤襍合成編之明證
矣書中間有附註或稱盧氏或稱周日用案文獻通
考載周盧註博物志十卷又盧氏博物志六卷此所

載寥寥數條殆非原本或亦後人偶爲摘附歟

刻連江葉氏本博物誌序

予家有汲古閣影鈔宋本博物誌末題云連江葉氏與今世所行本夔然不同嘗取而讀之乃知茂先此書大略撮取載籍所爲故自來目錄皆入之雜家其體例之獨創者則隨所撮取之書分別部居不相雜廁如卷首括地象畢方繼以考靈耀是也以下雖不能條舉所出然列子山海經逸周書等皆顯然可驗今本強立門類割裂遷就遂使蕩析離居失其旨趣致爲巨謬矣考晁氏讀書志及文獻通考皆載周日用注十卷卽是此本晁云首卷地理略後有讚文實爲吻合遂刻之以正今本之失於中仍不免訛錯如時含神霧三時是詩之誤毋丘儉遣王領三領是頥

之誤右詹山帝女化為詹艸六古詹山是古管山之誤海山

經作詹艸是管艸之誤山海經取伏卵段七段是暇之誤姑媯

東阿王韓詩外傳勇士有蕃丘訖八東阿是東海之誤蕃無王字

是蓄之誤射窮石以為伏虎八窮是寢之誤今見狗襲八

襲是壘之誤初學記師兩妻黑色八師兩妻是兩師妾之引作壘

誤樹之于闕聞十聞是間之誤此周書程又如莖必沐浴寤逸文也

昔夏后莖乘飛龍昔夏啟莖徙九鼎昔舜莖登天為神桀

莖伐唐昔鯀莖注洪水六莖皆筮之誤盡似仙人兩形盡見

似猿猴八盡皆畫之誤西夏云有巢以民十云民二字皆

亡之誤又如始皇陵一條四略不可讀及以宋敏求長安

志在十引關中記訂之乃得通其闕佚處附錄關中記曰秦始皇陵在驪

山之北高數十丈周六里今在陰盤縣界此陵雖高大不足以前六十萬人積年之功其用功力或隱不見不見者驪山水泉本北流者陂障使東西流又此山無石於渭北諸山運取大石故其歌曰運石甘泉口渭水爲不流千人一唱萬人相鈞今陵下餘石大如薤土屋其銷功力皆此類也此等皆不難校正今悉仍其舊者恐失真也略標數端以待善讀者引伸焉若夫通考所云博物四百本非有成書而劉昭郡國志注小司馬索隱李崇賢文選注及藝文類聚初學記太平御覽所引多出今本外隋志云博物志十卷張華撰又云張公雜記一卷張華撰梁有五卷與博物志相似小小不同又云雜記十一卷張華撰然則所引或出二書歟倘好事者搜輯纂錄不妨別存梗槩苟欲執彼以補此則恐取無事自擾之謂有所未可也嘉慶八年正月吳縣黃丕烈書

博物誌序

晉司空張華撰

地理略自魏氏日已前夏禹治四方而制之

余視山海經及禹貢爾雅說文地雖曰悉備各有所不載者作畧說出所不見粗言遠方陳山川位象吉凶有徵諸國境界犬牙相入春秋之後並相侵伐其土地不可具詳其山川地澤略而言之正國十二博物之士覽不卸焉

博物誌卷第一

晉司空張華撰

汝南周日用等注

河圖括地象曰地南北三億三萬五千五百里地祗之位起形高大者有崑崙山廣萬里高萬一千里神物之所生聖人仙人之所集也出五色雲氣五色流水其泉南流入中國名曰河也其山中應于天最居中八十城布繞之中國東南隅居其一分是好城也崑崙山北地轉下三千六百里有八玄幽都方二十萬里地下有四柱四柱廣十萬里地有三千六百軸犬牙相牽名山大川孔穴相內和氣所出則生石脂玉膏食之不死神龍靈龜行於穴中矣東

方有蟾螂沃焦防風氏長三丈短人處九寸遠夷之名雕
題黑齒穿擔耳天竺岐首地以名山爲輔佐石爲之骨川
爲之脉草木爲之毛土爲之內三尺以上爲糞三尺以下
爲地

考靈耀曰地有四遊冬至地上北而西三萬里夏至地下
南而東三萬里春秋二分其中矣地恆動不止譬如人在
舟坐舟行而人不覺

七戎六蠻九夷八狄形摠而言之謂之四海言皆近海海
之言晦昏無所覩也

漢北廣遠中國人鮮有至北海者漢使驃騎將軍霍去病
北伐單于至瀚海而還有北海明矣

周日用曰余聞北海
言蘇武牧羊之所去

年德甚邇祇一池號北海蘇武牧羊常在
於是耳此地見有蘇武廟非北溟之海
漢使張騫渡西
海至大秦西海之濱有小崑崙高萬仞方八百里東海廣
漫未聞有渡者

史記封禪書云齋冥燕昭遣人乘舟入海有蓬萊方丈瀛
洲三神山神人所集欲採仙藥蓋言先有至之者其鳥獸
皆白金銀爲宮闕悉在渤海中去人不遠也南海短狹未
及西南夷以窮斷今渡南海至交趾者不絕也

中國之城左濱海右通流沙方而言之萬五千里東至蓬
萊西至隴右后跨京北前及衡岳堯舜土萬里時七千里
亦無常隨德優劣也

東方少陽日月所出山谷清其人佼好

西方少陰日月所入其土窈冥其人高鼻深目多毛

南方太陽土下水淺其人大口多傲

北方太陰土平廣深其人廣面縮頸

中央四折風雨交山谷峻其人端正

堯別九州舜爲十二

五岳華岱恒衡嵩

四瀆河出崑崙墟江出岷山濟出王屋淮出桐柏八流亦
出名山渭出鳥鼠漢出蟠冢洛出熊耳涇出少室汝出燕
泉泗出陪尾沔出月台沃出太山水有五色有濁有清汝
南有黃水華山有黑水沔水淵或生明珠而岸不枯山澤
通氣以興雷雲氣觸石膚寸而合不崇朝以雨

小山有其形如鼓一足如蠡澤有委邪狀如轂長蛇音也

見之者霸

昔夏禹觀河見長人魚身出曰吾河精豈河伯也

馮夷華陰潼鄉人也得仙道化爲河伯豈道同哉仙夷乘龍虎水神乘魚龍其行恍惚萬里如室

水石之怪爲龍罔象木之怪爲夔魍魎土之怪爲墳羊火之怪爲宋無忌

地性含水土泉者引地氣也山有沙者生金有穀者生玉名山生神芝不死之草上芝爲車馬中芝爲人形下芝爲六畜土山多雲鐵山多石五土所宜黃白宜種禾黑墳宜麥黍蒼赤宜菽芋下泉宜稻得其宜則利百倍

有山者採有水者漁山氣多男澤氣多女平衍氣仁高凌

氣犯叢林氣蹙故擇其所居居在高中之平下中之高則
產好人

居無近絕溪羣豕狐蟲之所近此則死氣陰匿之處也

石者金之根甲石精流以生水水生木木含火援神契曰
五岳之神聖四瀆之精仁河者水之伯上應天漢太山天
帝孫也主召人魂東方萬物始故知人生命之長短

老子云萬民皆付西王母唯王聖人真人仙人道人之命
上屬九天君耳

五岳視三公四瀆視諸侯諸侯賞封內名山者通靈助化
位相亞也故地動臣叛名山崩王道訖川竭神去國隨也
亡海投九仞之魚流水涸國之大誠也澤浮舟川水溢臣

盛君衰百川沸騰山豕卒崩高岸爲谷深谷爲陵小人握命君子陵遲白黑不別大亂之徵也

江河水赤名曰泣血道路涉骸於河以處也

和氣相感則生朱草山出象車澤出神馬陵出黑丹阜出土怪江南大貝海出明珠仁主壽昌民延壽命天下太平秦前有藍田之鎮後有胡苑之塞左嶠函右隴蜀西通流沙險阻之國也

蜀漢之土與秦同域南跨邛笮北阻褒斜西卽隈礙隔以劔閣窮險極峻獨守之國也

周在中樞西阻嶠谷東望荆山南面少室北有太嶽三河之分雷風所起四險之國也

魏前枕黃河背彰水瞻王屋望梁山有藍田之寶浮池之淵趙東臨九州西瞻恆嶽有沃瀑之流飛壺井陘之險至于潁陽涿鹿之野

燕却背沙漠進臨易水西至君都東至於遼長蛇帶塞險陸相東也

齊南有長城巨防陽關之險北有河濟足以爲固越海而東通于九夷西界岱嶽配林之峻坂險之國也

魯前有淮水後有岱嶽蒙羽之向洙泗之流大野廣土曲阜尼丘

宋北有泗水南迄睢過有孟諸之澤碭山之塞也

楚後背方城前及衡嶽左則彭蠡右則九疑有江漢之流

實險阻之國也

南越之國與楚爲鄰五嶺已前至于南海負海之邦交趾之士謂之南裔

吳左洞庭右彭蠡後濱長江南至豫章水戒險阻之國也東越海通海處南北尾閭之間三江流入南海通東治嵩海深險絕之國也

衛南跨于河北得洪水南過漢上左通黎澤右指黎山

讚曰

地理廣大 四海八方 遐遠別域 略以難詳

侯王設險 守固保強 遠遮川塞 近備城堙

司察奸非 禁禦不良 勿恃危阨 恣其淫荒

無德則敗 有德則昌 安屋猶懼 乃可不亡
進用忠險 社稷永康 教民以孝 舜化以彰

博物誌卷第一

博物誌卷第二

凡月暈隨灰畫之隨所畫而闕

淮南子云未詳其法

麒麟鬪而日蝕

鯨魚死而彗星出

嬰兒號婦乳出

龍肉以醢漬之則文章生

人食鷲肉不可入水爲蛟龍所吞

人食終葵爲狗所齧瘡不差或致死

鼠食巴豆三年重三十斤

婦人妊身不欲令見醜惡物異類鳥獸食當避其異常味不欲令見熊羆虎豹御及鳥射射雉食牛心白犬肉鯉魚

頭席不正不坐割不正不食聽誦詩書諷詠之音不聽淫

聲不視邪色以此產子必賢明端正壽考所謂父母胎教

之法

盧氏曰子去得清祀滋液則生仁聖謂錯亂之氣則生貪淫子由之氣也

故古者婦人妊娠必慎所感感於善則善感於惡則惡矣
妊娠者不可啖兔肉又不可見兔令兒唇缺又不可啖生
薑令兒多指

異說云瞽叟夫婦凶頑而生舜叔梁紇淫夫也徵在失行

也加又野合而生仲尼焉其在有胎教也

盧氏曰夫甲及寅申生者聖以

年在歲德在甲寅壬申生者則然矣亦由先生也亦由父母氣也古者元氣清故多聖今者俗淫陰濁故無聖人也
五月五日埋蜻蜓頭於西向戶下埋至三日不食則化成

青真珠又云埋於正中門

莊子曰地三年種蜀黍其後七年多蛇

鬪戰死亡之處其人馬血積年化爲鱗鱗著地及草木如
露略不可見行人或有觸者著人體便有光拂拭便分散
無數愈甚有細咤聲如炒豆唯靜住良久乃滅後其人忽
忽如失魂經日乃差

今人梳頭脫著衣時有隨梳解結有光者亦有咤聲
白鷓雄雌相視則孕或曰雄鳴上風則雌孕

兔舐毫望月而孕口中吐子舊有此說余自所見也

馬食穀則足重不能行

鴈食粟則翼重不能飛

山居之民多癭腫疾由於飲泉之不流者今荆南諸山郡

東多此疾瘡由踐土之無鹵者今江外諸山懸偏多此病

也 盧氏曰不然也在山南人有之北人及吳楚無此病 蓋南出黑水水土然也如是不流泉井尤無此病也

人啖豆三年則身重行止難

啖榆則眠不欲覺

啖麥稼令人力健行

飲真茶令人少眠

人常食小豆令人肥肌膚燥

食鷲麥令人骨節斷解

山雞有美毛自愛其色終日映水目眩則溺死

鸛雉長毛雨雪惜其尾栖高樹杪不敢下食往往餓死時

魏景初中天下所說

鷓水鳥也伏卵時卵冷則不沸取礬石用繞卵以時助燥氣故方術家以鷓巢中礬石

燒馬蹄羊角成灰春夏散著濕地生羅勒大腰無雄龜鼉類也無雄與蛇通氣則孕細腰無雌蜂類也

取桑蠶或阜螽子呪而成子詩云螟蛉之子蜾蠃負之是也

煎麻油水氣盡無煙不復沸則還冷可內手攪之得水則艷起散卒不滅此只試之有驗

燒白石作白灰旣訖積著地經日都冷遇雨及水澆卽更燃煙艷起

蟻螬以背行快於足用

江南山谿中水射工蟲甲類也長一二寸口中有弩形氣

射人影隨所著處發瘡不治則殺人今鸚鵡蟲溺人影亦

隨所著處生瘡

盧氏曰以雞腸草膏塗經日即愈周日用日萬物皆有所相感愚聞以霹靂木擊鳥

影其鳥應時落地雖未嘗試以是類之必有之

百足一名馬虻中斷成兩段各行而去蜥蜴或名蝦蟇以

器養之以朱砂體盡赤所食滿七斤治擣萬杵點女人支

體終本不滅有房室事則滅故號守宮傳云東方朔語漢

武帝試之有驗

削汞令圓舉以向日以艾於後成其影則得火

取火法如用珠取火多有說者此未試

陳葵子微火炒令爆咤散者熟地遍蹋之朝種暮生遠不

過經宿耳

陳葵子秋種覆養令經冬不死春有子也

周日用曰愚聞熟地植生菜蘭

擣石流黃篩於其上以盆覆之卽時可待又以變白牡丹爲五色皆以五色汁日沃其根以紫草汁則變令紫紅花汁則變紅並未試於理可焉此出爾雅

鳥雌雄不可別翼右掩左雄左掩右雌二足而翼謂之禽

四足而毛謂之獸

人藉帶眠者則夢蛇

鳥啣人之髮夢飛

鵲巢門戶背太歲得非才智也

蠶三化先孕而後交不可者亦產子子後爲蠶皆無眉目

易傷收採亦薄

蟹漆相合成爲神仙藥服食方云

九竅者胎化八竅者卵生龜鼈皆此類咸卵生影伏

婦人妊娠未滿三月著聾衣冠平旦左遶井三匝映詳影

而去勿反顧勿令人知見必生男

周日用曰知女則可依法或先是男如何余聞

有定法定母年日月與受胎時日筭之遇奇則爲男遇偶則爲女知爲女復即可依法

荆州極西南界至蜀諸民曰獠子婦人妊娠七月而產臨

水生兒便置水中浮則收養之沈便弃之然千百多浮既

長皆拔去上齒牙各一以爲身飾

神仙傳曰說上據辰尾爲宿歲星降爲東方朔傳說死後

有此宿東方生無歲星

漢淮南王謀反被誅亦云得道輕舉

周日用曰漢書云淮南自刑應不然乎得

道輕舉非虛事也至今維揚境內馬迹猶存且日與八公
同處皆上品真人耳既談道德肯圖叛逆之事況恆行陰
德好書鼓不善弋獵淮南內書言神仙黃白之術去反事
遠矣夫古今書傳多黜仙道者慮帝王公侯廢万機而慕
其道故隱而不書唯老聃不可掩而云二百歲後西遊流
沙不知所之○庚書云蜀有女道士謝自然白日上昇此
外歷代史籍未嘗言也

鈞弋夫人被殺於雲陽而言尸解柩空

周日用曰史云夫
人被大風拔樹揚

沙揭石亦不
云尸解柩空

桓譚新論說方士有董仲君罪繫獄佯死臭自陷出既而

復生

魏時方士甘陵甘始

廬江有左慈陽城有郟儉始能行氣導引慈曉房中之術
善辟穀不食悉號二百歲人凡如此之徒武帝皆集之於

魏不使遊散甘始孝而少容曹子建密問其所行始言本師姓韓字世雅嘗與師於南海作金投數萬斤於海又取鯉魚一雙鯉遊行沈浮有若處淵其無藥者已熟而食言此藥去此踰遠萬里已不可行不能得也

齊桓公出因與管仲故道烏燉煌西沒流沙往外國沙沙千餘里中無水時時有汜流處人莫能知皆乘駱駝駱駝知水脉過其處輒停不肯行以足蹋地人於其蹋處掘之輒得水

諸遠方山郡幽辟處出蜜螞人往往以桶聚蜂每年一取人有山行墮深澗者無出路飢餓分死左右見龜蛇甚多朝暮引頸向東方人因伏地學之遂不飢體殊輕便能登

巖岸經數年後竦身舉臂遂超出澗上卽得還家顏色悅
懌頗更黠惠勝故還食穀淡滋味百餘日中復本質

天門郡有幽山峻谷谷在上人有從下經過者忽然踊出
林表狀如飛仙遂絕迹年中如此甚數遂名此處爲仙谷
有樂道好事者入此谷中洗沐以求飛仙往往得去有長
意思人疑必妖怪乃以大石自墮牽一犬入谷中犬復飛
去其人還告鄉里募數十人執杖搗山草伐木至山頂觀
之遙見一物長數十丈高隱人耳如簾箕格射刺殺之所
吞人骨積此左右有成封蟒開口廣尺餘前後失人皆此
蟒氣所噏上於是此地遂安隱無患

漢末關中大亂有發前漢時冢者人猶活旣出平復如舊

魏郭后愛念之錄著宮內常置左右問漢時宮中事說之
了了皆有次序后崩哭泣過禮遂死焉

漢末發范友朋冢奴猶活友朋霍光女聳說光家事廢立
之際多與漢書相應此奴常遊走於民間無止住處今不
知所在或云尙在余聞之於人可信而目不可見也

景初中蒼桐吏到京云廣州西南接交州數郡桂林晉興
寧浦閒人有病將死便有飛蟲大如小麥或云有甲在舍
上人氣絕來食亡者雖復撲殺有斗斛而來者如風雨前
後相尋續不可斷截肌肉都盡唯餘骨在便去盡貧家無
相纏者或殞殮不時皆受此弊有物力者則以衣服布帛
五六重裹亡者此蟲惡梓木氣卽以板鄣防左右并以作

器此蟲便不敢近也入交界更無轉近郡亦有但微少耳

博物誌卷第二

Blank page with vertical lines for text columns.

博物誌卷第三

河圖玉板云龍伯國人長三十丈生萬八千歲而死大秦國人長十丈中秦國人長一丈臨洮人長三丈五尺禹致宰臣於會稽防風氏後至戮而殺之其骨專車長狄喬如身橫九畝長五丈四尺或長十丈

秦始皇二十六年有大人十二見于臨洮長五丈足迹六尺東海之外大荒之中有大人國僬僥氏長三丈時含神霧

曰東北極人長九寸

漢武帝好仙道祭祀名山大澤以求神仙之道時西王母遣使乘白鹿告帝當來乃供帳九華殿以待之七月七日

夜漏七刻王母乘紫雲車而至於殿西南面東向頭上戴七種青氣鬱鬱如雲有三青鳥如鳥大使侍母旁時設九微燈帝東面西向王母索七桃大如彈丸以五枚與帝母食二枚帝食桃輒以核著膝前母曰取此核將何爲帝曰此桃甘美欲種之母笑曰此桃三千年一生實唯帝與母對坐其從者皆不得進時東方朔竊從殿南廂朱鳥牖中窺母母顧之謂帝曰此窺牖小兒嘗三來盜吾此桃帝乃大怪之由此世人謂方朔神仙也

漢武帝時弱水西國有人乘毛車以渡弱水來獻香者帝謂是常香非中國之所乏不禮其使留久之帝幸上林苑西使千乘輿聞并奏其香帝取之看大如鷲卵三枚與棗

相似帝不悅以付外庫後長安中大疫宮中皆疫病帝不舉樂西使乞見請燒所貢香一枚以辟疫氣帝不得已聽之宮中病者登日並差長安中百里咸聞香氣芳積九月餘日香猶不歇帝乃厚禮發遣餞送一說漢制獻香不滿斤西使臨去乃發香氣如大豆者拭著宮門香氣聞長安數十里經日乃歇

漢武帝時西海國有獻膠五兩者帝以付外庫餘膠半兩西使佩以自隨後從武帝射於甘泉宮帝弓弦斷從者欲更張弦西使乃進乞以所送餘香膠續之座中左右莫不怪西使乃以口濡膠爲以住斷絃兩頭相連注弦遂相著帝乃使力人各引其一頭終不相離西使曰可以射終日

不斷帝大怪左右稱奇因名曰續弦膠

漢武帝時大苑之北胡人有獻一物大如狗然聲能驚人
雞犬聞之皆走名曰猛獸帝見之怪其細小及出苑中欲
使虎狼食之虎見此獸卽低頭著地帝爲反觀見虎如此
欲謂下頭作勢起搏殺之而此獸見虎甚喜舐唇搖尾徑
住虎頭上立因搗虎面虎乃閉目低頭匍匐不敢動搗鼻
下去下去之後虎尾下頭去此獸顧之虎輒閉目後魏武
帝伐蹋頓經白狼山逢師子使人格之殺傷甚眾王乃自
率常從軍數百擊之師子哮吼奮起左右盛驚王忽見一
物從林中出如狸起上王車輒師子將至此獸便跳起上
師子頭上卽伏不敢起於是遂殺之得師子一還來至洛

陽三千里雞犬皆伏無鳴吠

舊說云天河與海通近世有人居海渚者年年八月有浮槎去來不失期人有奇志立飛閣於查上多齋糧乘槎而去十餘日中猶觀星月日辰自後茫茫忽忽亦不覺晝夜去十餘日奄至一處有城郭狀屋舍甚嚴遙望宮中多織婦見一丈夫牽牛渚次飲之牽牛人乃驚問曰何由至此此人見說來意并問此是何處答曰君還至蜀郡訪嚴君平則知之竟不上岸因還如期後至蜀問君平曰某年月日有客星犯牽牛宿計年月正是此人到天河時也

周官云格不渡汶水鸚不渡濟水魯國無鸚鵡來巢記異也

橘渡江北化爲枳今之江東甚有枳橘

太古書今見存有神農經山海經或云禹所作周易

蔡邕云禮記月令周公作

周日用曰禮記疏云第一是呂不韋春秋明呂氏所制蔡邕云

周公未之詳也

謚法司馬法周公所作

南越巢居北朔穴居避寒暑也

東南之人食水產西北之人食陸畜食水產者龜蛤螺蚌以爲珍味不覺其腥臊也食陸畜者狸兔鼠雀爲珍味不覺其臙焦也

毋丘儉遣王領追高句麗王宮盡沃沮東界問其耆老言國人常乘船捕魚遭風吹數十日東得一島上有人言語

不相曉其俗常以七夕取童女沈海又言有一國亦在海中純女無男又說得一布衣從海浮出其身如中國人衣兩袖長二丈又得一破船隨波出在海岸邊有一人項中復有面生得與語不通不食而死其地皆在沃沮東大海中

大宛國有汗血馬天馬種漢魏西域時有獻者越巂國有牛稍割取肉牛不死經日肉生如故

周書曰西域獻火浣布昆吾氏獻切玉刀火浣布汙則燒之卽潔刀切玉如蠟布漢世有獻者刀則未聞東海蛟錯魚生子子驚還入母腸尋復出

積油滿百石則自然生火武帝泰始中武庫災積油所致

常山之蛇名牽然有兩頭觸其一頭頭至觸其中則兩分俱至孫武以喻善用兵者

東海有物狀如凝血從廣數尺方圓名曰鮮魚無頭目處所內無藏眾蝦附之隨其東西人煮食之

取鼈挫令如碁子大擣赤莧汁和合厚以茅苞五六日中作投池中經旬日穢穢盡成鱉也

吳王江行食鱠有餘棄於中流化爲魚今魚中有名吳王鱠餘者長數寸大者如筋猶有鱠形

廣陵陳登食膾作病華他下之膾頭皆成蟲尾猶是膾

春秋書鼯鼠食郊牛牛死鼠之類最小者食物當時不覺痛世傳云亦食人項肥厚皮處亦不覺或名甘鼠俗人諱

此所嚙衰病之徵

博物誌卷第三

博物志

卷三

五

龍谿精舍校刊

[The main body of the page contains a large rectangular frame with vertical lines, which is currently empty of text.]

博物誌卷第四

殷三仁微子箕子比干 文王四友南宮括散宜生閔夭

太顛 仲尼四友顏淵子貢子路子張

春秋哀公十有四年春西狩獲麟公羊傳曰有以告者孔

子曰孰爲來哉孰爲來哉盧曰以其時非應故孔子泣而感之麟口吐三策蓋天使報聖

人

左傳曰叔孫氏之車子鉏商獲麟以爲不祥

司馬遷云無堯以天下讓許由事揚雄亦云誇大者爲之

揚雄又云無仙道桓譚亦同周日用曰神仙之道盛矣非揚雄桓譚之所能知且秦穆

趙鞅皆見上帝帝亦由仙乎既有鬼神豈无仙界況神烈

二傳有驗者匪一余覽唐史當上皇天寶之際老聃見者

十數至於御路陷井亦出言之以此詳之豈無是也

禮記曰孔子少孤不知其父墓母亡問於鄒曼父之母乃合葬於防防墓又崩門人後至孔子問來何遲門人實對孔子不應如是者三乃潛然流涕而止曰古不脩墓蔣濟何晏夏侯玄王肅皆云無此事注記者謬時賢咸從之周用曰四士言無者後有何理而述之在愚所見實未之有矣且徵在典梁紇野合而產事多隱之況我丘生而父已死既隱何以知之非問曼父之母安得合葬於防也

肉刑明王之制荀卿每論之興漢文帝感太倉公女之言而廢之班固著論互復迄漢末魏初陳紀又論宜申古制孔融云不可復欲申之鍾繇王朗不同遂寢夏侯玄李勝曹羲丁謐建私議各有彼此多去時未可復故遂道焉漢興多瑞應至武帝之世特甚麟鳳數見王莽時郡國多

稱瑞應歲歲相尋皆由順時之欲承旨求媚多無實應乃使人猜疑 三讓 一曰讓禮二曰固讓三曰終讓 上公備物九錫 一大輅各一玄牡二駟 二袞冕之服赤舄副之 三軒懸之樂六佾之舞 四朱戶以居 五納陛以登 六虎賁之士三百人 七鈇鉞各一 八彤弓一彤矢百旅弓十旅矢千 九拒鬯一卣珪瓚副之 舊洛陽字作水邊各火行也忌水故去水而加佳又魏於行次爲土水得土而流土得水而柔故復佳加水變雜爲洛焉

堯時有屈佚草生於庭佞人入朝則屈而指之一名指佞草

何以知還風也假令東風雲反從西來說說而疾此不旋踵立西風矣所以然者諸風皆從上下或薄於雲雲行疾下雖有微風不能勝上上風來到反矣

盜跖冢在大陽縣西

趙鞅冢在臨水縣界

曹參字敬伯

蔡伯喈母袁公妹曜卿姑也

余友人下邳陳德龍謂余言曰靈光殿賦南郡芘城王子山所作子山嘗之泰山從鮑子真學筭過魯國而殿觀賦之還歸本州溺死湘水時年二十餘也

南荆賦江陵有臺甚大而有一柱眾木皆共之

徐州人謂塵土爲蓬塊吳人謂跋跌

古駿馬有飛兔腰褭

周穆王八駿赤驥飛黃白蟻華騶騷耳騶踰渠黃盜驪

唐公有驪驢

項羽有騅

周日用曰曹公有流影而呂有赤兔皆後來有良駿也

周穆王有犬名耗毛白

晉靈公有害狗名獒

韓國有黑犬名盧

宋有駿犬曰離

犬四尺爲獒

寶劍名純鉤湛廬豪曹

魚腸巨闕五劍皆歐冶子所作

龍泉太阿工市三劍皆楚王者

風胡干因吳請干將歐冶亦作干將陽龍文莫邪陰漫理

此二劍吳王使干將作莫邪干將妻也

夫婦甚善作劍也

蔡邕有書萬卷漢末年載數車與王粲粲亡後相國掾魏

諷謀反粲子與焉既被誅邕所與粲書悉入粲族子葉字長緒卽正宗父正宗卽輔嗣兄也初粲與族兄凱避地荊州依劉表表有女表愛粲才欲以妻之嫌其形陋周率乃謂曰君才過人而體兒非女聳才凱有風兒乃妻凱生葉卽女所生

太丘長陳實實子鴻臚卿紀紀子司空羣羣子泰四世於漢魏二朝有重名而其德漸小減故時人爲其語曰公慙卿卿慙長

聖人制作曰經賢者著述曰傳鄭玄注毛詩曰箋不解此意或云毛公嘗爲北海郡守玄是此郡人故以爲敬

何休注公羊傳云何氏學又不能解者或答云休謙詞受

學於師乃宣此義不出於己此言爲允

漢丞秦羣臣上書皆曰昧死言王莽盜位慕古法昧死曰稽首光武因而不改

漢末喪亂絕無金石之樂魏武帝至漢中得杜夔舊法始復設軒懸鐘磬至於今用之於夔也

漢末喪亂絕無玉佩始復作之今之玉佩受於王粲也古者男子皆絲衣有故乃素服又有冠無幘故雖凶事皆著冠也 姜厚嗣祠在壩城長安西南三十里

周自后稷至于文武皆都關中號爲宗周秦爲阿房殿在長安西南二十里殿東西千步南北三百步上可以坐萬人庭中受十萬人二世爲趙高所殺於宜春宮在杜城南

三里葬於旁

始皇陵在驪山之北高數十丈周迴六七里今在陰盤縣界北陵雖高大不足以銷六丈水背陵郭使東西流又北山石運取大石於清北渚故歌曰運石甘泉口渭水爲不流千人唱萬人鈎金陵餘石大如堰土屋甚銷功力皆如此類

盧氏曰秦氏奢侈自知葬用珍寶多故高作陵園山者後難發也高則難上圍則難攻項羽爭衡之時發

其陵未詳其至棺否

博物誌卷第四

博物志卷第五

天地初不足故女媧氏練五色石以補其闕斷鼇足以立四極其後共工氏與顓頊爭帝而怒觸不周之山折天柱絕地維故天後傾西北日月星辰就焉地不滿東南故百川水注焉

越之東有駭泚之國其長子生則解而食之謂之宜弟父死則負其母而弃之言鬼妻不可與同居

周日用曰既其母爲鬼妻則其

爲鬼子亦合弃之矣是以如蠻夷於禽獸犬豕一等矣禽獸犬豕之徒猶應乃然也

楚之南有炎人之國其親戚死朽之肉而弃之然後埋其骨乃爲孝子也

秦之西有義渠國其親戚死聚柴積而焚之勳之卽煙上

謂之登遐然後爲孝此上以爲政下以爲侶東國未足爲

非也此事見墨子

周日用曰此事庶幾佛國之法且如是乎中國之徒亦多此也

孔子東遊見二小兒辯鬪問其故一小兒曰我以日始出時去人近而日中時遠也一小兒曰以日出而遠而日中時近一小兒曰日初出時大如車蓋及日中時如盤蓋此不爲遠者小而大者近乎一小兒曰日初出滄滄涼涼及其中而探湯此不爲近者熱而遠者涼乎孔子不能決謂兩小兒曰孰謂汝多知乎亦出列子

周日用曰且當中向熱者炎氣直下也譬

猶火氣直上而與旁著其炎涼可悉耳是明初出近而當中遠矣豈聖人肯對乎

詹何以獨繭絲爲綸芒斜爲鈎荆條爲竿剖粒爲餌引盈車之魚於百仞之淵泪流之中綸不絕鈎不申竿不撓

薛譚學謳於秦青未窮青之旨於一日遂辭歸秦青不饒於郊衢撫節悲歌聲震林木響遏行雲薛譚乃謝求返終身不敢言歸秦青顧謂其友曰昔韓娥東之齊遺糧過雍門鬻歌假食而去餘響遶梁三日不絕左右以其人弗去過逆旅凡人辱之韓娥因曼聲哀哭一里老幼喜歡拊舞弗能自禁乃厚賂而遣之故雍門人至今善歌哭效娥之遺聲也

趙襄子率徒十萬狩於中山藉芳燔林扇赫百里有人從石壁中出隨煙上下若無所之經涉者襄子以爲物徐察之乃人也問其奚道而處石奚道而入火其人曰奚物爲火其人曰不知也魏文侯聞之問於子夏曰彼何人哉子

夏曰以商所聞於夫子和者同於物物無得而傷閱者遊金石之間及蹈於水火皆可也文侯曰吾子奚不爲之子夏曰刳心知智商未能也非不能也雖試語之而卽暇矣文侯曰夫子奚不爲之子夏曰夫子能而不爲之侯不悅思士不妻而感思女不夫而孕后稷生乎巨跡伊尹生乎空乘

燕太子丹質於秦秦王遇之無禮不得意思欲歸請於秦王王不聽謬言曰令烏頭白馬生角秦王不得已而遣之爲機發之橋欲頭白俯而嗟馬生角秦王不得已而遣之爲機發之橋欲陷丹丹驅馳過之而橋不發遁到關關門不開丹爲雞鳴於是屨雞悉鳴遂還歸

昔劉玄石於中山酒家酤酒酒家與千日酒忘言其節度歸至家當醉而家人不知以爲死也權葬之酒家計千日滿乃憶玄石前來酤酒醉向醒耳往視之云玄石亡來三年已葬於是開棺醉始醒俗云玄石飲酒一醉千日

西域有蒲萄酒積年不敗彼俗云可十年飲之醉彌月乃解

古之善射者甘蠅蠅之弟子曰飛衛更羸善謂魏王曰臣能射爲虛發而下鳥王曰然可於此乎曰聞有鳥從東來羸虛發而下之也

按北太行山而北去不知山所限極處亦如東海不知窮盡也

成王冠周公使祝雍曰辭達而勿多也祝雍曰近於民遠於佞近於義嗇於時惠於財任賢使能陛下摛顯先帝光耀以奉皇天之嘉祿欽順仲壹之言曰遵並大道郊域康阜萬國之休靈始明元服推遠童稚之幼志弘積文武之就德肅勤高祖之清廟六合之內靡不蒙德歲歲與天無極右孝昭用成王冠辭

止雨祝曰天生五穀以養人民今天雨不止用傷五穀如何如何靈而不幸殺牲以賽神靈雨則不止鳴鼓攻之朱綠繩繫而脅之

請雨曰皇皇上天照臨下土集地之靈神降甘雨庶物羣生咸得其所

周時德澤盛蒿大以爲宮柱名曰蒿官

博物志卷第五

博物誌卷第六

黃帝治天下百年而死民畏其神百年以其數百年故曰黃帝治三百年上古男三十而妻女二十而嫁曾子曰弟子不學古知之矣

貧者不勝其憂富者不勝其樂

曾子曰好我者知吾美矣惡我者知吾惡矣

龜三千歲旋於卷耳之上

武王伐殷舍於幾逢大雨焉乘輿三百乘甲三千一日一夜行三百里以戰於牧野

蒼一千歲而三百莖其本以老故知吉凶蒼未大於本爲上吉莖必沐浴齋潔食香每日望浴蒼必五浴之浴龜亦

然明夷曰昔夏后莖乘飛龍而登于天而牧占四華陶陶曰吉昔夏啟莖徙九鼎啟果徙之

昔舜莖登天爲神牧占有黃龍神曰不吉

武王伐殷而牧占著老著老曰吉桀莖伐唐而牧占熒惑曰不吉

昔鮌莖注洪水而牧占大明曰不吉有初無後

有鳥如鳥文首白喙赤足曰精衛故精衛常取西山之木石以填東海

右詹山帝女化爲詹草其葉鬱茂其華黃實如豆服者媚於人

胡粉白石灰等以水和之塗鬢鬚不白塗訖著油單裏今

溫煥候欲燥未燥間洗之湯則不得著晚則多折用煖湯洗訖澤塗之欲染當熟洗鬚鬢有膩不著藥臨染時亦當拭鬚燥溫之

子利國人一手一足拳反曲

張騫使西域還乃得胡桃種

江陵有猛人能化爲虎俗又曰虎化爲人好著紫葛衣足無踵

泰山一曰天孫言爲天帝孫也主召人魂魄東方萬物始成知人生命之長短

洞庭君山帝之二女居之曰湘夫人又荊州圖語曰湘君所遊故曰君山也有道與吳包山潛通上有美酒數斗得



博物誌卷第七

神農經曰藥物有大毒不可入口鼻耳目者卽殺人一日

鈎吻

盧氏曰廕地黃精不相連根苗獨生者是也二日鴟狀如雌雞生中山三日陰命赤色著木懸其子山海

中四日丙童狀如鷲赤生海中五日鴝羽如雀黑頭赤豕亦曰螭蟠生海中雄曰鴝雌曰螭蟠也

神農經曰藥種有五物一曰狼毒占斯解之二曰巴豆藿

汁解之三曰黎蘆湯解之四曰天雄烏頭大豆解之五曰

班茅戎鹽解之毒采害小兒乳汁解先食飲二升


黃帝問天老曰天地所生豈有食之令人不死者乎天老

曰太陽之草名曰黃精餌而食之可以長生太陰之草名

曰鈎吻不可食入口立死

人信鈎吻之殺人不信黃精之益壽不亦惑乎

周日用曰草既殺人



魏武帝好養性法亦解方藥招引四方術之士如左元放
華他之徒无不畢至周日用曰曹雖好奇而心道異如何
見殺若非變化已至滅身故有道
者不合親之矣既要試術即可乎

文帝典論曰陳思王曹植辯道論云世有吾王悉招至之
甘陵有甘始盧江有左慈陽城有郟儉始能行氣儉善辟
穀悉號三百歲人自王與太子及余之兄弟咸以爲調笑
不全信之然嘗試郟儉穀百日猶與寢處行步起居自若
也夫人不食七日則死而儉乃敢如是左慈修房中之術
善可以終命然非有至情莫能行也甘始老而少容自請
術士咸共歸之王使郟孟節主領諸人

又一說皇甫隆遇青牛道士姓封名君達其餘養性法卽

可放用大略云體欲嘗少勞無過虛食去肥濃節酸鹹減思慮損喜怒除馳逐慎房室施寫秋冬閉藏詳別篇武帝行之有效

又云王仲統云甘始左元放東郭延年形容成御婦人法並爲丞相所錄問行其術亦得其驗降就道士劉景受雲母九子丸方年三百歲莫知所在武帝恆御此藥亦云有驗劉德治淮南王獄得枕中鴻寶苑秘書及子向咸共奇之信黃白之術可成謂神仙之道可致卒亦無驗乃以僱罪也

周日用曰神仙之道學之匪一朝一夕而可得黃白者也仍須有分昇騰者應須有骨安可偶然而得法也

劉根不覺饑渴或謂能忍盈虛王仲都當盛夏之月十爐

火炙之不熱當嚴冬之時裸之而不寒桓山君以爲性耐寒暑恆山以無仙道好奇者爲之前者已述焉

近魏明帝時河東有焦生者裸而不衣處火不焦入水不

凍杜恕爲太守親所呼見皆有實事

周日用曰焦孝然途河居一菴大雪菴倒

人以爲死而視之蒸氣於雪略無變色時或析薪惠人而已故魏書云自義皇已來一人而已

穎川陳元方韓元長時之通才者所以並信有仙者其父時所傳聞河南密縣有成公其人出行不知所至復來還語其家云我得仙因與家人辭訣而去其步漸高良久乃沒而不見至今密縣傳其仙去二君以信有仙蓋由此也

周日用曰豈惟二子乎

左元放荒年法擇大豆麤細調勻必生熟投之令有光燠

氣徹豆心內先不食一日以冷水頓服訖其魚肉菜果不得復經口渴卽飲水慎不可煖飲初小困十數日後體力壯健不復思食

大鮫法服三升爲劑亦當隨入先食多少增損之盛豐欲還者煮葵子及脂蘇服肉羹漸漸飲之須豆下乃可食豆未盡而以食實物腸塞則殺人矣此未試或可以然周曰又一法鵬塗黏餅炙餅令熱卽塗之以意量多少卽食之如常渴卽飲冷水忌熱茶耳

魏王所集方士名 上黨王眞 隴西封君達 甘陵甘

始 魯女生 譙國華他字元化 東郭延年 唐雱

冷壽光 河南卜式 張貂 薊子訓 汝南費長房鮮

奴辜 魏國軍吏河南趙聖師 陽城郟儉字孟節 廬

江左慈字元放 右十六人魏文帝東阿王仲長統所說
皆能斷穀不食分形隱沒出入不由門戶左慈能變形幻
人視聽厭刻鬼魅皆此類也周禮所謂怪民王制稱挾左
道者也

又典論云議郎李覃學郊儉辟穀服茯苓飲水中不寒洩
痢殆至殞命軍祭酒弘農董分學甘始鴟視狼顧呼吸吐
納爲之過差氣閉不通良久乃蘇寺人嚴峻就左慈學補
導之術闍豎眞無事於斯而逐聲若此

魏文帝所記諸物相似亂者 武夫怪石似美玉 蛇牀
亂藤無 齊茈亂人參 杜衡亂細辛 雌黃似石留黃
鱖魚相亂以有大小相異 敵休亂門冬 百步似門

冬 房葵似狼毒 鈎吻堇與苜蓿相似 拔揆與卑解
相似一名狗脊 菊有二種苗花如一唯味小異苦者不
中食 野葛食之殺人家葛種之三年不收後旅生亦不
可食

神仙傳云松柏脂入地千年化爲茯苓茯苓化爲琥珀琥
珀一名江珠今泰山出茯苓而無琥珀萊州永昌出琥珀
而無茯苓或云燒蜂巢所作未詳此二說

神農本草云雞卵可作琥珀其法取伏卵段黃白渾雜者
煮及尙軟隨意刻作物以苦酒漬數宿旣堅內著粉中佳
者乃亂真矣此世所恆用作無不成者

積艾草三年後燒津液下流成鉛錫已試有驗

燒鉛錫成胡粉猶類也 燒丹朱成水銀則不類

物同類異用者 烏頭天雄附子一物春秋冬夏採各異也 遠志苗曰小草根曰遠志 芎藭苗曰江離根曰芎藭

地黃藍首斷心分根菜種皆生女蘿寄生兔絲兔絲寄生木上生根不著地

博物誌卷第七

博物誌卷第八

黃帝登仙其臣左徹者削木象黃帝帥諸侯以朝之七年不還左徹乃立顓頊左徹亦仙去也

子路與子貢過鄭神社社樹有烏神牽率子路子貢說之乃止

處士東鬼塊責禹亂天下事禹退作三章強者攻弱者守敵戰城郭蓋禹始也

澹臺子羽子溺水死欲葬之滅明曰此命也與螻蟻何親與魚鼈何讐遂不使葬

元始元年中謁者沛郡史岑上書訟王宏奪董賢璽綬之功靈帝和光元年遼西太守黃翻上言海邊有流屍露冠

絳衣體兒完全使翻感夢云我伯夷之弟孤竹君也海水壞吾棺槨求見掩藏民有襁裸視皆無疾而亡

豫章郡衣冠人有數婦暴面予道尋道爭分銖以給其夫與馬衣資及舉孝廉更敢富者一切皆給先者雖有數年之勤婦子滿堂室猶放黜以避後人

代城始築立板幹一旦亡西南四五十板於澤中自立結草爲外門因就營築焉故其城直周三十七里爲九門故城處爲東城

漢滕公薨求葬東都門外公卿送喪駟馬不行踏地悲鳴跑蹄下地得石有銘曰佳城鬱鬱三千年見白日吁嗟滕公居此室遂葬焉

衛靈公葬得石槨銘曰不逢箕子靈公奪我里

漢西都時南宮寢殿內有醇儒王史威長死葬銘曰明明哲士知存知亡崇隴原豐非寧非康不封不樹作靈乘光厥銘何伊王史威長

列傳云聶政刺韓相白虹爲之貫日

要離刺慶忌彗星襲月

專諸刺吳王僚鷹擊殿上

子胥伐楚燔其府庫破其九龍之鍾

武王伐紂至盟津渡河大風波武王操戈秉麾麾之風波立霽

魯陽公與韓戰酣而日暮援戈麾之日反三舍

太公爲灌壇令武王夢婦人當道夜哭問之曰吾是東海神女嫁於西海神童今灌壇令當道廢我行我行必有大風雨而太公有德吾不敢以暴風雨過是毀君德武王明日召太公三日三夜果有疾風暴雨從太公邑外過

晉文公出大蛇當道如拱文公反修德使吏守蛇吏夢天殺蛇曰何故當聖君道覺而視蛇則自死也

齊景公伐宋過泰山夢二人怒公謂太山之神晏子謂宋祖湯與伊尹也爲言其狀湯皙容多髮伊尹黑而短卽所夢也景公進軍不聽軍鼓毀公怒散軍伐宋

澹臺子羽渡河濟千金之璧于河河伯欲之至陽侯波起兩鮫挾船子羽左操璧右操劍擊鮫皆死旣渡三投璧于

河伯河伯躍而歸之子羽毀而去

荆軻字次非渡鮫夾船次非不奏斷其頭而風波靜除

周

用曰余嘗行經荆將軍墓墓與羊角哀冢鄰昔安伯旌左爲荆將軍所伐乃在此也其地在苑陵之源求見其墓碑將軍名乃作次飛字也

東阿王勇士有蕃丘訢過神淵使飲馬馬沈訢朝服拔劍

二日一夜殺二蛟一龍而出雷隨擊之七日夜眇其左目


楚熊渠子夜行射窮石以爲伏虎不爲沒羽

徐偃王志云徐君宮人娠而生卵以爲不祥弃之水濱獨

孤母有犬名鵠蒼獵於水濱得所弃卵嚼以來歸獨孤母

以爲異覆煖之遂蚬成兒生時正偃故以爲名徐君宮中

聞之乃更錄取長而仁智襲君徐國後鵠倉臨死生角而



表上之藏於官庫後議郎汝南樊行夷校書東觀表上言
堯舜之時舊有此官今天降印宜可復置

孝武建元四年天雨粟孝元景寧元年南陽郡都雨穀小
者如黍粟而青黑而味苦大者如大豆赤黃味如麥下三
日生根菜狀如大豆初生時也

大司馬曹休所統中郎謝璋部曲義兵奚儂息女年四歲
病歿故埋葬五日復生太和三年詔令休使父母同時送
女來視其年四月三日病死四月埋藏至八日同壚入採
桑聞兒生活今能飲酒如常

結胷國有滅蒙烏奇肱民善爲扞扛以殺百禽能爲飛車
從風遠行湯時西風至吹其車至豫州揚破其車不以視

民十年東風至乃復作車遣返其國去玉門關四萬里
比翼鳥一青一赤在參崴山

羽民國民有翼飛不遠多鸞鳥民食其卵去九疑四萬三
千里

驩兜國其民盡似仙人帝堯司徒驩兜民常捕海島中人
面鳥口去南國萬六千里盡似仙人也

厭光國民光出口中形盡似猿猴黑色

三苗國昔唐堯以天下讓於虞三苗之民非之帝殺有苗
之民叛浮入南海爲三苗國

穿胷國昔禹平天下禽諸侯會稽之野防風氏後到殺之
夏德之盛二龍降之禹使范成光御之行域外旣周而還

至南海經房風房風之神二臣以塗山之戮見禹便怒而射之迅風雷二龍昇去二臣恐以刃自貫其心而死禹哀之乃拔其刃療以不死之草是爲穿胷民 交趾足交在穿胷東

孟舒國民人首鳥身其先主爲嚳氏訓百禽夏后之世始食卵孟舒去之鳳皇隨焉

止些山多竹長千仞鳳食其實去九疑萬八千里

員丘山上有不死樹食之乃壽有赤泉飲之不老多大蛇爲人害不得居也

蒙雙民昔高陽氏有同產而爲夫婦帝放之此野相抱而死神鳥以不死草覆之七年男女皆活同頸二頭四手是

蒙雙民

大人國其人孕三十六年生白頭其兒則長大能乘雲而不能走蓋龍類去會稽四萬六千里 風山之首方高三百里風穴如電突深三十里春風自此而出也

君子國人衣冠帶劔使兩虎民衣野絲好禮讓不爭土千里多薰華之草民多疾風氣故人不蕃息好讓故爲君子國堇花朝生夕死箕子居朝鮮其後伐燕之朝鮮亡入海爲鮮國師雨妻黑色珥雨青蛇操兩蛇蓋勾芒也

神宮在高石沼中有神人多麒麟其芝神草有英泉飲之服三百歲乃覺不死去琅邪四萬五千里嘔絲之野女子乃跪據樹嘔絲在三桑西也

博物誌卷第九

臨邛火井一所從廣五尺深二三丈有在縣南百里昔時人以竹木投以取火諸葛丞相往視之後火轉盛執盆蓋井上煮鹽得鹽入以家火卽滅訖今不復燃也

酒泉延壽縣南山名火泉火出如炬

徐公曰西域使王暢說石流黃出疋彌山去高昌八百里有石流黃數十丈從廣五六十畝有取流黃晝視孔中上狀如煙而高數尺夜視皆如燈光明高尺餘暢所視見入也言時氣不知皆往保此山

魏文帝黃初三年武都西都尉王褒獻石膽三十斤四年獻三斤

九守有神牛乃生谿上黑出時共鬪卽海沸黃或出鬪岸上家牛皆怖人或遮則霹靂號曰神牛

日南有野女羣行見丈夫狀晶自裸袒無衣禡

昔日南貢四象各有雌雄其一雄死於九真乃至南海百有餘日其雌塗土著身不飲食空草長史問其所以聞之輒流涕矣

南方有落頭以其頭能飛其種人常有所祭祀號曰虫落故因取之焉以其飛因服便去以耳爲翼將曉還復著體吳時往往得此人也

東海中有牛體魚其形狀如牛剥其皮懸之潮水至則毛起潮去則毛伏

南海有鱐魚狀似鼉斬其頭而乾之去齒而更生如此者
三乃止

屠龜解其肌肉唯腸連其頭而經日不死猶能齧物烏往
食之則爲所得漁者或以張鳥神蛇復續

無啓民居穴食土無男女死埋之其心不朽百年還化爲
人細民其肝不朽百年而化爲人皆穴居處三國同類也
南海外有鮫人水居如魚不廢織績其限能泣珠

蜀山南高山上物如獼猴長七尺能人行健走名曰猴
獮一名化或曰猥獮同行道婦女有好者輒盜之以去人
不得知行者或每遇其旁皆以長繩相引然故不免此得
男女氣自死故取男也取去爲室家其生子者終身不得

還十年之後形皆類之意亦迷惑不復思歸有子者輒俱送還其家產子皆如人有不食養者其母輒死故無敢不養也及長與人不異皆以楊爲姓故今蜀中西界多謂楊率率皆猴獲化之子孫時時相有獲爪者也

越地深山有鳥如鳩青色名曰治鳥穿大樹作巢如升器其戶口徑數寸周飾以土墜白相次狀如射侯伐木見此樹卽避之去或夜冥人不見鳥鳥亦知人不見已也鳴曰咄咄去明日便宜息上樹去咄咄下去明日便宜急下若使去但言笑而不已者可止伐也若有穢要及犯其止者則虎通夕來守人不知者卽害人此鳥白日見其形鳥也夜聽其鳴人也時觀樂便作人悲喜形長三尺澗中取石

蟹就人火間炙之不可犯也越人謂此鳥爲越祝之祖

交州夷名曰俚子俚子弓長數尺箭長餘以焦銅爲鏑塗毒藥於鏑鋒中人卽死不時斂藏卽臍脹沸爛須臾焦煎都盡唯骨耳其俗誓不以此藥法語人治之飲婦人月水及糞汁時有差者唯射猪犬者無佗以其食糞故也焦銅者故燒器其長老唯別焦銅聲以物杵之徐聽其聲得焦毒者偏鑿取以爲箭鏑

蝮蛇秋月毒盛無所螫螫草木以泄其氣草木卽死人樵採設爲草木所傷刺者亦殺人毒治於蝮齧謂之蛇迹也江南諸山郡中大樹斷倒者經春夏生菌謂之榘食之有味而忽毒殺人云此物往往自有毒者或云蛇所著之

楓樹生者啖之令人笑不得止治之飲土漿多愈
人以冷冰水自漬至膝可頓啖數十枚瓜漬至腰啖轉多
至頸可啖百餘枚所漬水皆作瓜氣味此事未試人中酒
不解治之以湯自漬卽愈湯亦作酒氣味也

平原管輅善卜筮解鳥語

漢中興士人皆冠葛巾建安中魏武帝造白蛤於是遂廢
唯二學書生猶著也

博物誌卷第九

博物誌卷第十

著末大於本爲卜吉次蒿次荆皆如是

龜著皆月望裕之五

夏桀之時爲長夜宮於深谷之中男女雜處十旬不出聽政天乃大風揚沙一夕填此空谷

又曰石室瑤臺關龍逢諫桀言曰吾之有民如天之有日日亡我則亡以爲龍逢妖言而殺之其後山復於谷下及在上耆老相與諫桀又以爲妖言而殺之

夏桀之時費昌之河上見二日在東者爛爛將起在西者沉沉將滅若疾雷之聲昌問於馮夷曰何者爲殷何者爲夏馮夷曰西夏東殷於是費昌徙族歸殷

昔彼高陽是生伯鯀布土取帝之息壤以填洪水

昔西夏仁而去兵城郭不修武士無位唐伐之西夏云昔者玄都賢鬼神道廢人事其謀臣不用龜策是從忠臣無祿神巫用國

猩猩若黃狗人面能言

犬戎文馬赤鬣身白目黃金名古黃之乘復薊之露犬也能飛食虎豹

榆州氏之君孤而無使曲沃進伐之以亡

昔有巢氏有臣而貴任之專國主斷斷已而奪之臣怒而生變有巢以民昔者清陽強力貴美女不治國而亡

昔在洛氏宮室無常囿池廣大人民困匱商伐之有洛以亡大妣夢見商之庭產棘乃小子發取周庭梓樹樹之子

闕聞梓化爲松柏棫柞覺驚以告文王文王曰慎勿言冬
日之陽夏日之餘不召而萬物自來天道尙左日月西移
地道尙右水潦東流天不享於殷自發之未生於今年
禹羊在牧水潦東流天下飛鴻滿野日之出地無移照乎
帝之二女堯之二女也丘乎曰南湘夫人二女啼以涕揮
竹竹盡斑

華山有蛇名肥遺六足四翼見則天下大旱

崇丘山有鳥一足一翼一目相得而飛名曰童見則吉良
乘之壽千歲

夷海內西北有軒轅國在窮山之際其不壽者八百歲渚
沃之野鸞自舞民食鳳卵飲甘露

博物誌 卷一 二
白民國有乘黃狀如狐背上有角乘之壽三千歲

海水西夸父與日相逐走渴飲水河謂不足北飲大澤未至渴而死棄其策杖化爲鄧林

嘔絲之野有女子方跪據樹嘔絲北海外也

三珠樹生赤水之上

遠方諸山蜜臍處以木爲器開小孔以蜜臘塗器內外令遍春月蜂將生育時捕取三兩頭著器中蜂飛去尋將伴來經日漸益遂停器中

魏武伐蹋頓經白狼山逢師子使格之見一物從竹中出如狸上帝車輓上師子將至便跳師子頭師子伏不敢起遂殺之得師子還至四十里雞犬皆無鳴吠

東海有牛魚其形如牛引其皮懸之潮水至則毛起潮退則毛伏

王尔張衡馬均昔冒重霧行一人無恙一人病一人死問其故無恙人曰我飲酒病者食死者空腹

赤刀周之寶器也

博物誌卷第十終

博物誌校詁

序

覽不卸焉

稗海本作覽而鑿焉

卷一

地祁之位

稗海本祁作部

背彰水

王謨本彰作漳

齋冥燕昭

稗海本齊冥作威宣

卷二

人食終葵

稗海本終作冬

御及鳥射

稗海本鳥射作射鳥

子太

得清祀滋液

稗海本去作之祀作純

亦由先生也

生王謨本作天

此

只試之有驗

稗海本只作亦

終本不滅

王謨本本作年

成其影

稗海

本成作承

不可者

稗海本可作交

知為女復

王謨本復作後

庚書云

庚王謨本作唐

發范友朋冢

王謨本朋作明

截飢肉都盡

飢王謨本作肌

卷三

西使千乘輿聞

稗海本千作至聞作間王謨本千作干

名牽然

稗海本牽

作牽

卷四 實未之有矣王謨本有作無 在大陽縣西稗海本西 而

殿覩賦之覩字當在殿上 有害狗名獒王謨本害作畜 工市稗海本工

原作上 風胡千千當作子 漢丞秦稗海本丞作承 姜厚嗣祠稗海本厚

卷五 朽之肉而弃之稗海本之內作其肉 勳之稗海本勳作熏 下以

為侶侶當作俗 如盤蓋蓋當作孟 不餞於郊衢稗海本不作乃 其

人曰不知也王謨本日作若 名曰蒿官官當作宮

卷六 以其數百年王謨本其教百年 白啄啄當作喙

卷七 招引四方術之士術之 穀百日穀上當有辟字 自請

術士請稗海本作諸 桓山君稗海本桓作恆 奴辜稗海本鮮奴辜

卷八 暴面予道予當作于 更敢富者敢稗海本作取 不為沒羽

稗海本
不作矢

偃王既其國

稗海本既
下有主字

不忍聞言其民

稗海

本聞言
作鬪害

揚破其車

稗海本
揚作揚

禽諸侯

禽當
作會

言時氣

不知

知稗海
本作和

卷九

晶自

稗海本
自作目

不飲食空草

空稗海
本作莖

無啓民

啓王

謨本
作啓

三國

三稗海
本作二

此得男女氣

女稗海
本作子

故取男

也

男稗海
本作女

其生子者

生子稗海
本作年少

若有穢要

要稗海
本作惡

箭長餘

餘上當
有尺字

無所蜚螫

螫稗海
本作螫

卷十

丘乎曰南湘夫人

稗海本作曰
湘夫人舜崩

黃刻連江葉氏本博物志十卷最爲完善據以覆刊

其文義傳鈔間有譌舛據今本別爲校記以便讀者

壯武此書多采古籍所紀王莽時郡國多稱瑞應歲

歲相尋皆由順時之欲承旨求媚多無實應意存鑒
戒不徒以博覽爲職志三苗之顛防風之戮自來無
異議乃今觀之大可感喟世安得有不死之草乎穿
胷之民以視宏演之肝萇宏之血奚異焉乙卯冬十
月校竟并識聖遺

後跋

去歲謀刻是書命兒子玉堂依影宋鈔者錄一帙與粵東
賈人往古藥洲開彫洎成寄歸復命之用原書纖悉校正
因檢予彙所刻汲古閣秘書目中有北宋版博物志一
本估價四兩云其次序與南宋版不同係蜀本大字真奇
物也影鈔當出於此自是一重公案予前序略而不及謂
宜作後序表出之碌碌未果也今年修版方畢而玉堂遽
病病二十許日以二月七日死矣子夏號咷漢碑語千載同
痛擬屬我友顧君千里爲撰小傳并搜其篋中一二讀殘
之書倘係秘笈卽付剗用希附驥乃憶及前事輒跋是
書之尾從此印行有日而玉堂竟不逮見也可悲也夫時

博物記
後通
嘉慶九年三月丕烈又書

廣陵邱義卿監刻
紹周揚州周楚江鑄刻